

Na osnovu člana 71. i člana 125. Statuta Općine Vogošća ("Službene novine Kantona Sarajevo", broj: 27/14 - Prečišćeni tekst i broj: 14/15), općinski Načelnik donosi:

P R A V I L N I K

o uslovima, načinu i kriterijima za odobravanje
jednokratne novčane pomoći licima u stanju socijalne potrebe i teško oboljelim licima
sa područja općine Vogošća

Član 1.

Ovim Pravilnikom utvrđuju se uslovi, način i kriteriji za odobravanje jednokratne novčane pomoći licima koja se nalaze u stanju socijalne potrebe i teško oboljelim licima sa područja općine Vogošća.

Član 2.

Na osnovu člana 11. stava 2. Zakona o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije BiH", broj: 36/99, 54/04, 39/06, 14/09 i 45/16) socijalnom potrebom smatra se trajno ili privremeno stanje u kome se nalazi građanin ili porodica, prouzrokovano ratnim događajima, elementarnim nesrećama, općom ekonomskom krizom, psihofizičkim stanjem pojedinaca ili drugih razloga, koje se ne mogu otkloniti bez pomoći drugog lica.

Član 3.

Na osnovu člana 12. stav 1. Zakona o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije BiH" broj: 36/99, 54/04, 39/06, 14/09 i 45/16), korisnici socijalne zaštite su lica koja se nalaze u stanju socijalne potrebe i to:

1. djeca bez roditeljskog staranja,
2. odgojno zanemarena djeca,
3. odgojno zapuštena djeca,
4. djeca čiji je razvoj ometen porodičnim prilikama,
5. lica sa invaliditetom i lica ometena u fizičkom i psihičkom razvoju,
6. materijalno neosigurana i za rad nesposobna lica,
7. stara lica bez porodičnog staranja,
8. lica sa društveno negativnim ponašanjem,
9. lica i porodice u stanju socijalne potrebe kojima je uslijed posebnih okolnosti potreban odgovarajući oblik socijalne zaštite.

Član 4.

Lice odnosno porodica u stanju socijalne potrebe, kojima je uslijed posebnih okolnosti potreban odgovarajući oblik socijalne zaštite, u smislu navedenog člana 12. tačka 9) iz člana 3. Pravilnika smatra se lice, odnosno porodica koja se nađe u stanju socijalne potrebe zbog pretrpljene prisilne migracije, repatrijacije, elementarne nepogode, smrti jednog ili više članova porodice, povratka sa liječenja, otpuštanja sa izdržavanja kazne zatvora ili izvršavanja odgojne mjere, a na osnovu člana 18. stav 1. Zakona o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije BiH" broj: 36/99, 54/04, 39/06, 14/09 i 45/16).

Član 5.

Osobe i porodice koje se nađu u stanju socijalne potrebe iz razloga koji nisu propisani u članu 18. Federalnog zakona, na osnovu mišljenja stručnog tima Službe, mogu ostvariti pravo na jednokratnu ili izuzetnu novčanu pomoć na osnovu Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Kantona Sarajevo“, broj: 38/14 – Prečišćeni tekst, 38/16 i 44/17).

Član 6.

Na osnovu člana 14. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj: 38/14 – Prečišćeni tekst, 38/16 i 44/17), korisnici socijalne zaštite, pored korisnika utvrđenih Federalnim zakonom su i:

- osobe i porodice koje bi svoju socijalnu sigurnost trebale ostvariti od primanja, a ta primanja nisu dovoljna za podmirenje njihovih osnovnih životnih potreba;
- osobe izložene zlostavljanju i nasilju u porodici.

Član 7.

Jednokratna novčana pomoć će se dodjeljivati licima iz člana 3. i 4. Pravilnika za slijedeće svrhe:

- osnovne životne potrebe licima i porodicama koje nemaju nikakvih prihoda, a nalaze se u stanju socijalne potrebe;
- za liječenje različitih malignih oboljenja, rijetkih oboljenja i drugih teških bolesti, a na osnovu preporuke Konzilija ljekara nadležne medicinske ustanove;
- za nabavku lijekova koji se ne nalaze na esencijalnoj listi lijekova Kantona Sarajevo;
- za participiranje u troškovima liječenja u inostranstvu, a na osnovu preporuke nadležne medicinske ustanove;
- pomoć za vladine i nevladine organizacije koje se bave poslovima socijalne i dječije zaštite do visine jednokratne novčane pomoći.

Član 8.

- 1) Zahtjev za dodjelu jednokratne novčane pomoći po ovom Pravilniku podnosi se Službi za boračko-invalidsku i socijalnu zaštitu putem Centra za pružanje usluga građanima Općine Vogošća na propisanom obrascu.
- 2) Podnesene zahtjeve po potrebi razmatra Komisija za rješavanje zahtjeva za priznavanje prava na jednokratne novčane pomoći (u daljem tekstu: Komisija), a koju imenuje Općinski načelnik.
- 3) Komisija se sastoji od predsjednika i dva člana, od kojih je Predsjednik komisije socijalni radnik nadležne Službe, a članovi pravnik nadležne Službe i socijalni radnik JU "Kantonalni centar za socijalni rad" - Službe socijalne zaštite Općine Vogošća.

Član 9.

Pravo na dodjelu jednokratne novčane pomoći može se odobriti samo na osnovu podnesenog zahtjeva, priloženih dokaza i izlaskom na teren po potrebi i procjeni Komisije iz kojih se može utvrditi da se lice ili porodica nalazi u stanju socijalne potrebe.

Član 10.

- 1) Podneseni zahtjevi će se rješavati po datumu podnošenja.
- 2) Komisija će cijeniti da li je zahtjev opravdan i ako jeste dostaviće prijedlog Načelniku za dodjelu istih.
- 3) Pravo na dodjelu jednokratne novčane pomoći priznaje se zaključkom koji donosi općinski Načelnik.
- 4) U izuzetnim slučajevima, a zbog težine situacije i hitnosti slučaja lica ili porodice koja su se obratila zahtjevom, Komisija će iste rješavati mimo procedure utvrđene stavom 1. ovog člana Pravilnika.

Član 11.

- 1) Podnosiocu zahtjeva može se odobriti jednokratna pomoć samo jednom u toku jedne budžetske godine, a izuzetno prema procjeni stanja, u socijalno opravdanim i zdravstvenim slučajevima, tri puta u toku jedne budžetske godine i to do visine izuzetne novčane pomoći.
- 2) Komisija će u svakom konkretnom slučaju, iznos odobrenih novčanih sredstava utvrditi na osnovu socijalno materijalnog statusa podnosioca zahtjeva, težine i prirode bolesti, hitnosti slučaja.

- 3) Komisija će prilikom utvrđivanja iznosa odobravanja jednokratne novčane pomoći, kao poseban kriterij cijeniti činjenicu da li se zahtjev za pomoć podnosi prvi put kao i kriterij da li je podnositelj zahtjeva već ostvarivao pravo na novčanu pomoć iz Budžeta Općine Vogošća, a na osnovu baze podataka Službe za boračko-invalidsku i socijalnu zaštitu.
- 4) Lica koja su ostvarila pravo na dodjelu jednokratnu novčanu pomoć putem JU "Kantonalni centar za socijalni rad" – Služba socijalne zaštite Općine Vogošća po istom osnovu ne mogu ostvariti pravo na jednokratnu novčanu pomoć u Općini Vogošća, osim u izuzetnim slučajevima.

Član 12.

Za sve što nije regulisano ovim Pravilnikom za lica u stanju socijalne potrebe primjenjuju se odredbe Zakona o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije BiH" broj: 36/99, 54/04, 39/06, 14/09 i 45/16), Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj: 38/14 – Prečišćeni tekst, 38/16 i 44/17) i Odlukom o odobravanju i isplati jednokratne novčane pomoći licima u stanju socijalne potrebe.

Član 13.

Stupanjem na snagu ovog Pravilnika, prestaje da važi Pravilnik o uslovima, načinu i kriterijima za odobravanje jednokratne novčane pomoći licima u stanju socijalne potrebe i teško oboljelim licima sa područja općine Vogošća, broj: 09/1-35-100/17 od 23.01.2017.godine.

Član 14.

Izmjene i dopune ovog Pravilnika vršit će se na način i po postupku koji važi za njegovo donošenje.

Član 15.

Ovaj Pravilnik stupa na snagu danom donošenja, a objavit će se na oglasnoj ploči Općine Vogošća.

Broj: 09/1-35-357/18
Datum: 13.02.2018. godine

